

„Jedan od sastojaka
uspjeha je i put od
neuspjeha do neusp-
jeha, a da pritom ne
gubite entuzijazam.“

Winston Churchill

NOVOSTI

VAŽNOST KOMUNIKACIJSKIH I PREZENTACIJSKIH VJEŠTINA

U subotu, 02. jula, u prostorijama ASA Prevent grupacije održan je mjesečni sastanak studenata stipendista Fondacije Hastor. Ovom prilikom ugostili smo Vedrana Peršića koji je sa našim studentima podijelio znanja i iskustva o prezentacijskim i komunikacijskim vještinama.

Vedran je vođa odjela za marketing i komunikacije u Sberbank BH, te bivši uposlenik ASA Prevent grupacije i dugogodišnji prijatelj Fondacije Hastor. S obzirom na činjenicu da se

svi studenti po završetku studija suočavaju sa nemilosrdnim tržištem rada, u Fondaciji Hastor činimo sve da naše studente pripremimo i osposobimo za izazove koji ih čekaju u njihovim profesionalnim karijerama. Vedran je tokom predavanja posebnu pažnju obratio na razvijanje komunikacijskih vještina, verbalnu i neverbalnu komunikaciju i istakao važnost dobrog umijeća komuniciranja na radnom mjestu, intervjuima za posao, ali i u svakodnevnoj komunikaciji. Našim studentima dao je savjete kako da porade na izgradnji samopouzdanja, a poseban akcenat stavio je na obrazovanje i na konstantno nadograđivanje našeg znanja, jer kako ističe, znanje je osnova dobre komunikacije, a za njim dolazi i samopouzdanje, vještine, i najzad, željeni uspjeh. Koji su to ciljevi komunikacije,

vidovi komuniciranja, kako savladati strah od javnog nastupa, osnovi i ciljevi dobre prezentacije - samo su neka od pitanja o kojima je naš predavač govorio, a odgovore i savjete u vezi istih Vedran je našim stipendistima dao na osnovu svog bogatog radnog iskustva. Ova interaktivna i posve zanimljiva prezentacija omogućila je našim stipendistima da sudjeluju u diskusiji, postavljaju pitanje, daju komentar ili pak zatraže savjet od našeg predavača, a na kraju smo se svi složili u istom - prisustvovali smo jako korisnom predavanju i učili o vještinama koje su nam neophodne u svim aspektima društvenog života, a o kojima nas nažalost rijetko uče na fakultetima.

Džulisa Otuzbir





„Svi naši snovi mogu se ostvariti ako imate hrabrosti da ih jurite.“

Walt Disney

NOVOSTI

STIPENDISTA FONDACIJE HASTOR VOĐA UČESNIKA NA JUNIORSKOJ BALKANSKOJ MATEMATIČKOJ OLIMPIJADI

Ove godine održana je 20. Juniorska Balkanska Matematička Olimpijada u rumunskom gradu Slatini, u periodu od 24. do 29. juna. Mladi bosanskohercegovački matematičari uspjeli su osvojiti četiri bronzane medalje. Vođa učesnika ove olimpijade bio je naš stipendista Adnan Ibrić, student treće godine Prirodno-matematičkog fakulteta u Tuzli na Odsjeku za matematiku.

Juniorska Balkanska Matematička Olimpijada je takmičenje balkanskih zemalja za učenike osnovnih škola do 15 godina. Cilj ove olimpijade je da razvije takmičarski duh i podstakne učenike koji su darovani matematičkim znanjem da još više rade na svom upjehu. Učešće na ovom takmičenju zabilježilo je šest učenika iz Bosne i Hercegovine od kojih je četvero uspjelo osvojiti bronzane medalje. Adnan, zajedno sa još dvoje profesora bio je vođa ove ekipe.

Za vrijeme svog školovanja u Gimnaziji Lukavac osvojio je brojne nagrade na takmičenjima iz matematike od kojih ističe prvo mjesto na državnom takmičenju, a tu su i srebrna medalja na Balkanskoj Matematičkoj



Olimpijadi i bronzana medalja na Internacionalnoj Matematičkoj Olimpijadi za srednje škole. Također, učestvovao je u radu komisija na kantonalnim i federalnim takmičenjima, a pored toga daje instrukcije iz matematike studentima i srednjoškolcima i priprema ih za takmičenja.

Sadžida Kosovac

ADISA BOLIĆ NASTAVLJA NIZATI USPJEHE


Naša stipendistica Adisa Bolić ponovo oduševljava uspjehom. Na ovogodišnjoj 57. Internacionalnoj Matematičkoj Olimpijadi koja se održava u Hong Kongu u periodu od 6.7. do 16.7. predstavnici naše države osvojili su 4 bronzane medalje, a među njima je i naša Adisa.

Ona je učenica trećeg razreda Tursko-bosanskog koledža u Sarajevu, a njen izvanredni talenat i ljubav prema matematici odranije su poznati Fondaciji Hastor ali i široj javnosti zahvaljujući njenim uspjesima kako na državnim, tako i na međunarodnim takmičenjima. Naša Adisa, ali i ostali predstavnici Bosne i Hercegovine na ovoj

Olimpijadi istinski su ambasadori naše države, predstavnici su uspjeha, talenta, mladih snaga i svega lijepog što Bosna i Hercegovina međunarodnoj zajednici može da pruži. Vijesti o ovakvim uspjesima doprinose pozitivnoj slici naše zajednice, a u našoj Fondaciji posebno slavimo uspjehe naših stipendista jer su njihovi upjesi kruna našega rada.



Džulisa Otuzbir



**“Svakog dana
ponesi korpu zemlje
na isto mjesto i
sazidaćeš planinu.”**

Konfučije

NOVOSTI

LJETNI RASPUST U HOLANDIJI

Fondacija Hastor i organizacija Kinderhulp Bosnie iz Holandije od 2006. godine realizuju projekat „Ljetni raspust u Holandiji“. Djeca iz socijalno ugroženih porodica iz BiH putuju u Holandiju na dvadesetjednodnevni odmor, druženje i edukaciju. Naša Fondacija od 2006. godine pomaže pri selekciji djece i pripremi neophodne dokumentacije. Stipendisti-volonteri Fondacije Hastor idu sa djecom u Holandiju u ulozi pratilaca, a ovogodišnji pratioci bile su Zemira Bektić i Irma Ogršević koje su dobile priliku da budu mali lideri na ovom odmoru.

Krenuli su 11. juna prema Holandiji, a 12. juna su stigli na svoje odredište gdje su bili do 2. jula. U Holandiji su ih dočekali ljubazni ljudi, čiju su kulturu i običaje uspjeli upoznati bolje u toku svog boravka u ovoj zemlji. Također su ostali oduševljeni ljepotama Holadije. Djeca su se najviše obrađovala igračkama, luna parkovima, kućama sa bazenima, trampolinama i slično. Iako su se proveli u Holadiji kao nikad prije, djeca su ipak poželjela svoju

domovinu, porodicu i bosansku hranu i često su govorili da im nedostaje mamina pita.

Irma i Zemira se nisu poznavale prije ovog putovanja, iako su obje stipendistice Fondacije Hastor, ali su se vratile obogaćene za još jedno divno iskustvo i prijateljstvo. Odlazak u Holandiju kao mladi lideri bio je pravi izazov za njih, s obzirom da su se prvi put susrele sa ovakvim zadatkom, ali su jako sretne i ponosne što su otišle i pokazale timski rad koji su uspjele naučiti u Fondaciji Hastor, kao i kako biti dobar vođa i koordinator i držati sve probleme pod kontrolom.

Sadžida Kosovac



UPOZNAJTE KREATORA NOVOG LOGOTIPA FONDACIJE HASTOR

/ STIPENDISTI

U obilježavanju desete godišnjice rada i postojanja Fondacije Hastor učestvuju svi naši stipendisti - posredno ili neposredno. Naši najtalentovaniji stipendisti pridružili su se obilježavanju ovog jubileja i svojim umijećima dali doprinos ovom svečanom činu. U nastavku upoznajte kreatora posebnog izdanja logotipa koji je nastao povodom obilježavanja naše godišnjice.

Sanel Delić je stipendista Fondacije Hastor još od 2008. godine. Trenutno završava master studij arhitekture na Internacionalnom Burch Univerzitetu. Prepoznatljiv po svom velikom talentu i motivaciji, od oktobra 2015. godine radi u kompaniji Walter BIM Solutions u sektoru Revit developmenta. Pored posla, fakultetskih obaveza i obaveza prema Fondaciji, Sanel ostatak vremena provodi baveći se web i grafičkim dizajnom. Poseban naglasak na njegov trud i kreativnost treba staviti to da je u masi radova upravo njegov izabran da obilježi deset godina postojanja Fondacije Hastor. Na pitanje šta ga je motivisalo da kreira logotip

koji je naišao na veliko odobravanje u Fondaciji Sanel odgovara:

“Pored osnovnog obilježja Fondacije, čuvene kapice sa početnim slovima Fondacije Hastor i broja 10 koji označava godišnjicu, u logotip su upisane riječi koje za mene predstavljaju Fondaciju Hastor. Neke od riječi koje se nalaze na logotipu su: obrazovanje, perspektiva, povjerenje, učenje, volontiranje, odgoj, motivacija, humanost, uspjeh, podrška, poznanstvo itd. Svima onima koji su upoznati sa radom Fondacije su ove riječi jako bliske, pa sam tako u jednom logotipu htio da objedinim sve ono što Fondaciju Hastor čini jednom

velikom porodicom svih njenih stipendista, volontera i donatora.” Pored izrade logotipa, Sanel je vođa tima koji u posljednje vrijeme aktivno radi na razvoju aplikacije za Fondaciju Hastor.

Hanka Mujkić





/ UČITELJEV KUTAK

RIBARI

Obilazeći porodice iz Konjica koje su podnijele zahtjev za dodjelu stipendije Fondacije Hastor za školsku 2016/2017 našao se u Buturović Polju, Seonici, Goranima, a zatim u Orašju, Spiljanima, Bijeloj.

Iz Bijele krećem u selo Ribare. Vozeći se za Ribare prolazim pored Boračkog jezera koje je od Konjica udaljeno oko 20 kilometara i stižem u Glavatičevo, 28 kilometara daleko od Konjica, a onda još 4 kilometra, više makadamom nego asfaltom, stigoh u Ribare. Iako zaseok sa nekoliko kuća, dobro bih se namučio da me domaćin kojem sam pošao nije čekao sa knjigom u ruci na ulazu u zaseok. Tu se završi cesta i dalje se mora pješice po hercegovačkom kršu s kamena na kamen. Uđoh u kuću gdje me doprati domaćin, a tamo žena i dvoje djece, učenik devetog i učenica sedmog razreda osnovne škole. Djeca jedva dobar uspjeh u školi. Imaju malo zemlje i jednu kravu. Sa zemlje obezbijede kukuruz, krompir i grah. Od novca od prodatog teleta četveročlana porodica preživljava do narednog teleta.

„Mi ćemo slaviti taj dan kad saznamo da će naše dijete primati stipendiju Fondacije Hastor“ reče domaćin kad mu rekoh da mu sin ima velike šanse da postane stipendista Fondacije. „Jer to će donositi godišnje više nego što mi dosad imamo.“ „Da bi vam dijete bilo i dalje stipendista Fondacije Hastor mora poboljšati svoj uspjeh“ rekoh roditeljima. „Pa truditi će se više i vjerujem da će iskoristiti priliku ako mu se pruži i nećemo dozvoliti da našom krivicom ponovo budemo bez stipendije“ dodade domaćica. Vraćajući se za Vogošću prate me slike te sretno porodice.

Iako nemaju materijalnih sredstava, ni puta, ni interneta, imaju puno ljubavi i zadovoljni su sa tim što imaju.




“Kreativan čovjek motivisan je željom da postigne, a ne željom da pobijedi druge.”

Ayn Rand

URADI SAM

Naša stipendistica Berina Baraković ovoga mjeseca dala nam je ideju za ukrašavanje drvene kutije koja nam može poslužiti kao kutija za nakit ili originalan poklon nekome.

Za izradu kutije potrebno je: kutija, željene boje, ukrasi, salveta, ljepilo za salvetu, četkice, lak, reljef pasta, šablon. Prije početka potrebno je zaštititi površinu na kojoj ćemo raditi, običnim papirom ili nekom krpom. Nakon toga počinje rad.



01 Šmirglom za drvo učiniti kutiju glatkom i odstraniti višak drveta koji se stvori prilikom rezanja.




02 Obojiti cijelu kutiju, njenu vanjsku stranu i unutrašnjost, kombinujući boje, a ako želite možete koristiti i istu boju. Prilikom farbanja koristimo akrilne boje.



03 Nakon što se boja na kutiji osušila, preko površine na koju ćemo lijepiti salvetu nanosimo ljepilo i sačekamo da se osuši, nakon toga skidamo dva sloja sa salvete i na kutiju stavljamo samo onaj sloj koji na sebi nosi sliku. Nakon što postavimo salvetu na željeno mjesto na kutiji, četkicom lagano prelazimo preko salvetice i nanosimo sloj ljepila za salvete. Sačekamo da se osuši. Odstraniti višak salvetice koji prelazi predviđeno mjesto (makazama, prstima, vodom).



04 Nakon što se salveta na našoj kutiji osušila, bitno je i zaštititi salvetu, pa je zbog toga lakiramo u dva sloja. Prvo nanijeti jedan sloj laka, sačekati da se osuši i onda nanijeti i drugi sloj. Bitno je napomenuti da se prilikom nanošenja laka treba paziti i ne pritiskati grubo po salveti da se ne bi pokidala.



05 Kutiju ukasiti prema želji. Na ovoj kutiji korišten je cvijet koji je obojen u boje koje odgovaraju dekoraciji kutije. Konturnom bijelom bojom u obliku tačkica obojeni su krajevi poklopca kutije. Unutrašnji dio kutije dekorisan je imitacijom ptičijeg kaveza, koji je također obojen u odgovarajuću boju.



07 Nakon što smo nanijeli sve željene ukrase, lakiramo cijelu kutiju. Ponovo sa dva sloja, ali s tim da ovaj put ne lakiramo preko salvete.
Na kraju to izgleda ovako:





06 Prednju stranu kutije ukasiti reljef pastom i obojiti odgovarajućom bojom. Uzmemo šablon koji želimo, zalijepimo vrhove šablona običnom trakom da se ne bi micala i špartlom ili nožem nanesimo sloj reljefne paste. Nakon toga pažljivo skinemo šablon i obojimo u odgovarajuću boju.





Ljetni raspust u Holandiji 2016



“Da bismo postigli velike stvari, moramo ne samo da djelujemo, već i sanjamo, ne samo da planiramo, već i vjerujemo.”

Anatole
France

/ STIPENDISTA MJESECA

MARIJA PIŠKOVIĆ

Marija Pišković, studentica druge godine Muzičke akademije u Sarajevu na smjeru flauta, izabrana je za ovomjesečnu stipendisticu mjeseca.



Marija je stipendistica Fondacije Hastor postala prošle godine, ali je već uveliko jedan od članova koji svojim znanjem i upornošću uveliko doprinose našem radu. Svojom ljubavlju, predanošću i odgovornošću pristupa, ne samo fakultetskim, nego i obavezama naše Fondacije. Trenutno, sa još dvije kolegice, volontira u Posušju. Kaže kako joj volontiranje, pored duge i iscrpne vožnje iz Sarajeva uvijek donese neka nova iskustva, kreacije i kako je uz pomoć volontiranja stekla veliki broj prijatelja. Također je zaslužna i za lijepu atmosferu i dobru muziku na likovnoj izložbi Fondacije Hastor. Flautu je izabrala slučajno, ali ljubav prema muzici u njoj je još od malih nogu. U slobodno vrijeme, pored toga što svira, voli i da pjeva i čita, ali učestvuje i u raznim volonterskim događajima i projektima. Ističe kako joj Fondacija pruža veliku podršku kako u finasijskom tako i u svim ostalim aspektima. Mi se nadamo da će Marija i dalje nastaviti nizati odlične uspjehe i da će nas još dugo vremena veseliti svojom divnom muzikom.

Hanka Mujkić

/ PISMO MJESECA

*Dragi moji prijatelji,
Teško mi je pronaći riječi kojima ću izraziti zahvalnost i zadovoljstvo zbog primanja vaše stipendije. Svaki mjesec kada poštar donese tu radost na moja kućna vrata, ja se zahvalim Bogu što postojite i što pomažete mlade i ambiciozne ljude.
Trenutno sam na raspustu. Zaslužno odmaram jer se cijelu godinu marljivo radilo. Ne volim se hvaliti svojim uspjesima, ali i ovu školsku godinu sam završio odličnim uspjehom i primjernim vladanjem. Planiram se u ovoj i narednoj godini još više potruditi jer za upis na Medicinski fakultet, što je moja želja, treba puno truda i mnogo, mnogo učenja. Nadam se da ću uspjeti u tome. Budite sretni što vaša stipendija pomaže u ostvarivanju sna jednog mladog momka.
Želim i vama lijep provod i puno lijepih trenutaka za pamćenje u ovom ljetu!*

Puno pozdrava iz Maglaja,
Adis Merdić
Srednja tehnička škola Tešanj